



Cuira, ils 27 da fanadur 2023

Communicaziun a las medias

Entrada en uffizi tar la Lia Rumantscha

Markus Solinger nov secretari general

Markus Solinger, il nov secretari general da la Lia Rumantscha, entra en uffizi il 1. d'avust 2023. La suprastanza da la Lia Rumantscha aveva elegì el l'avrigl 2023. Ensemèn cun la direcziun da quatter persunas maina el l'operativa da l'uniun tetgala da las organisaziuns linguisticas rumantschas.

Markus Solinger suonda a Diego Deplazes che ha bandunà il december 2022 la Lia Rumantscha. Dapi lura è il secretariat da la Lia Rumantscha vegnì manà ad interim dad Andreas Gabriel. La suprastanza da la Lia Rumantscha, presidiada dad Urezza Famos e Gianna Luzio, aveva elegì Markus Solinger l'avrigl 2023 suenter ina fasa da recrutaziun intensiva.

«Jau ma legrel fitg sin mia nova incumbensa. Mia visiun persunala è ina Lia Rumantscha sco center da cumpetenzza che pussibilitescha e promova il svilup da la Rumantschia. Quai vulain nus cuntanscher cun servetschs che sa drizzan tenor ils basegns da las Rumantschas e dals Rumantschs. Il tema da la digitalisaziun gioga ina rolla centrala. Impurtant è qua ina buna communicaziun interna ed externa che jau vuless intensivar», skizzescha Markus Solinger sias prioritads.

Markus Solinger (*1968) è da Scuol ed ha experientschas multifaras en differentas posiziuns e branschas, tant en il champ d'associaziuns sco er en in ambient economic naziunal ed internaziunal. Il novelegì secretari da la Lia Rumantscha è oriundamain commerziant ed ha absolvi in studi d'econom da manaschi SAS. Omaduas scolaziuns ha el fatg a Cuira. Sco commember da la direcziun ha Markus Solinger manà diesch onns las partiziuns marketing e scolaziun da l'Associaziun svizra da l'industria da gas.

Il 1. d'avust 2023 surpiglia Markus Solinger la direcziun operativa da la Lia Rumantscha cun actualmain 21 collavuraturas e collavuratur en var 13 plazzas cumplainas en la sedia principala a Cuira ed en ils biros regionals a Glion, Savognin, Scuol e Vargistagn.